

摘藻堂四庫全書薈要

集部

欽定四庫全書薈要

集部

翰苑集卷一

一至三

詳校官編修臣汪鏞



欽定四庫全書薈要

翰苑集目錄

卷一

制誥 一

卷二

制誥 二

卷三

制誥 三



卷四

制誥四

卷五

制誥五

卷六

制誥六

卷七

制誥七

卷八

制誥_八

卷九

制誥_九

卷十

制誥_十

卷十一

奏草_一

卷十二

奏草 二

卷十三

奏草 三

卷十四

奏草 四

卷十五

奏草 五

卷十六

奏草 六

卷十七

中書奏議 一

卷十八

中書奏議 二

卷十九

中書奏議 三

卷二十

中書奏議 四

卷二十一

中書奏議 五

卷二十二

中書奏議 六

臣等謹案翰苑集二十二卷唐陸贄撰贄字

敬輿嘉興人歷官中書侍郎同中書門下平

章事謚曰宣事蹟具唐書本傳宋祁作傳贊稱其論諫數十百篇譏陳時病皆本仁義炳炳如丹而惜德宗之不能盡用其言故祁史例不錄排偶之作獨取贊文十餘篇以為後世法司馬光作資治通鑑尤重贊議論所採奏疏至三十九篇其後蘇軾亦乞以贊文校正進讀蓋其文雖多出於一時匡救規切之語而於古今政治得失之故無不深切著明

洵有足為萬世龜鑑者贄尚有詩文別集十
五卷久佚不傳全唐詩所錄僅存試帖詩三
首及語林所載逸句說者或以亡失不完為
恨然經世有用之言悉具是書則所以為贄
重者固不必在雕章繪句之末矣乾隆四十
二年二月恭校上

總纂官臣紀昀
臣陸錫熊
臣孫士毅

總校官臣陸費墀

翰苑集原序

嘗讀賈誼書觀其經制人文鋪陳帝業術亦至矣待之
宣室恨得後時遇亦深矣然竟不能達四聰而盡其善
排羣議而試厥謀道之難行亦已久矣東陽絳灌何代
無之嘻一薰一蕕善齊不能同其器方鑿圓柄良工無
以措巧心所以理世少而亂日多大雅衰而正聲寢漢
道未融既失之於賈傅吾唐不幸復擯棄於陸公公諱
贇字敬輿吳郡蘇人溧陽令侶之子年十八登進士第

應博學宏辭科授鄭縣尉非其好也省母歸壽春刺史
張鑑有名於時一獲晤言大加賞識暨別鑑以泉貨數
萬為賁曰願以此奉太夫人一日之膳公悉辭之領新
茶一串而已是歲以書判拔萃調渭南簿

本傳
作尉

御史府

以監察換之德宗皇帝春宮時知名召對翰林即日為
學士由祠部員外轉考功郎中朱泚之亂從幸奉天時
車駕播遷詔書旁午公灑翰即成不復起草初若不經
思慮及成而奏無不曲盡事情中於機會倉卒填委同

職者無不拱手歎伏不能復有所助嘗從容奏曰此時
詔書陛下宜痛自引過以感人心昔禹湯以罪已勃興
楚昭以善言復國陛下誠能不恡改過以言謝天下俾
臣草辭無諱庶幾羣盜革心上從之故行在詔書始下
雖武人悍卒無不揮涕激發議者以德宗克平寇亂不
惟神武之功爪牙宣力蓋亦資文德腹心之助焉及還
京師李抱真來朝奏曰陛下在山南時山東士卒聞書
詔之辭無不感泣思奮臣節臣知賊不足平也公自行

在帶本職拜諫議大夫中書舍人精敏小心未嘗有過
艱難扈從行在輒隨啓沃謀猷特所親信有時讌語不
以公卿指名但呼陸九而已初幸梁洋棧道危狹從官
前後相失上夜次山館召公不至泣然號於禁旅曰得
陸贄者賞千金頃之公至太子親王皆賀初公既職內
署母韋氏尚在吳中上遣中使迎致京師道路置驛文
士榮之丁韋夫人憂去職持喪於洛遣人護溧陽之柩
附葬河南上遣中使監護其事四方賻遺數百萬公一

無所取素與蜀帥韋南康布衣友善韋令每月置遺公
奏而受之服闋復內職權知兵部侍郎覲見之日天子
為之興改容叙弔優禮如此內外屬望旦夕俟其輔政
為竇參忌嫉故緩之真拜兵部侍郎知貢舉得人之盛
公議稱之貞元八年拜中書侍郎平章事公以少年入
侍內殿特蒙知遇不可與衆浮沈苟且自受事有不可
必諍之上察物太精躬臨庶政失其大體動與公違姦
諛從而間之屢至不悅親友或規之公曰吾上不負天

子下不負吾所學不恤其他公精於吏事斟酌剖決不
爽錙銖其經綸制度具在德宗實錄及實參納劉士寧
之賂為李巽所發得罪左遷橫議者以公與參素不協
歸罷相之議於公戶部侍郎判度支裴延齡以姦回得
幸害時蠹政物議莫敢指言公獨以身當之屢言不可
翰林學士吳通元忌公先達每切中傷陰結延齡互言
公短宰相趙憬公之引拔升為同列以公排邪守正心
復異之羣邪沮謀直道不勝十年退公為賓客罷政事

明年夏旱芻糧不給軍校訴於上延齡奏曰此皆陸贄
輩怨望鼓扇軍人也貶公忠州別駕上怒不可測賴陽
城張萬福救之獲免蜀帥韋令抗表請以贄代己歲賂
資糧公在南賓閉門却掃郡人稀識其面復避謗不著
書惟考校醫方撰集驗方五十卷行於世江峽十稔永
貞初與鄭餘慶陽城同徵還公已薨歿時年五十二公
之秉筆內署也推古揚今雄文藻思敷之為文誥伸之
為典謨俾標校向風懦夫增氣則有制誥集一十卷覽

公之作則知公之為文也潤色之餘論思獻納軍國利害巨細必陳則有奏草七卷覽公之奏則知公之為臣也其在相位也推賢與能舉直措枉將幹璿衡而揭日月清氛沴而平泰階敷其道也與伊說爭衡考其文也與典謨接軫則有中書奏議七卷覽公之奏議則知公之事君也古人以士之遇也其要有四焉才位時命也仲尼有才而無位其道不行賈生有時而無命終於一慟惟公才不謂不長位不謂不達逢時而不盡其道非

命歟裴氏之子焉能使公不遇哉說者又以房魏姚宋
逢時遇主克致清平陸君亦獲幸時君而不能與房魏
爭列蓋道未至也應之曰道雖在我弘之在人蜚蝗竟
天農稷不能善稼奔車覆轍丘軻亦廢規行若使四君
與公易時而相則一否一臧未可知也而致君不及貞
觀開元者蓋時不幸也宣公不幸哉以為其道未至不
亦誣乎公之文集有詩文賦集表狀為別集十五卷其
關於時政昭昭然與金石不朽者惟制誥奏議乎雖已

流行多謬編次今以類相從冠於編首兼略書其官氏
景行以為序引俾後之君子覽公制作效之為文為臣
事君之道不其偉歟權德輿撰

宋進呈奏議劄子

元祐八年五月七日蘇軾同呂希哲吳安詩豐稷趙彥
若范祖禹顧臨劄子奏臣等猥以空疎備員講讀聖明
天縱學問日新臣等才有限而道無窮心欲言而口不
逮以此自愧莫知所為竊謂人臣之納忠譬如醫者之
用藥藥雖進於醫手方多傳於古人若已經効於世間
不必皆從於己出伏見唐宰相陸贄才本王佐學為帝
師論深切於事情言不離於道德智於子房而文則過

辯如賈誼而術不疎上以格君心之非下以通天下之志但其不幸仕不遇時德宗以苛刻為能而贄諫之以忠厚德宗以猜疑為術而贄勸之以推誠德宗好用兵而贄以消兵為先德宗好聚財而贄以散財為急至於用人聽言之法治邊馭將之方罪己以收人心改過以應天道去小人以除民患惜名器以待有功如此之流未易悉數可謂進苦口之藥石鍼害身之膏肓使德宗盡用其言則貞觀可得而復臣等每退自西閣即私相

告言以陛下聖明必喜贊議論但使聖賢之相契即如
臣主之同時昔馮唐論頗牧之賢則漢文為之太息魏
相條鼂董之對則孝宣以致中興若陛下能自得師莫
若近取諸贊夫六經三史諸子百家非無可觀皆足為
治但聖言幽遠末學支離譬如山海之崇深難以一二
而推擇如贊之論開卷了然聚古今之精英實治亂之
龜鑑臣等欲取其奏議稍加校正繕寫進呈願陛下置
之坐隅如見贊面反復熟讀如與贊言必能發聖性之

高明成治功於歲月臣等不勝區區之意

欽定四庫全書薈要卷二萬六百七

集部

翰苑集卷一

唐 陸贄 撰

制誥

赦宥上

奉天改元大赦制

平朱泚後改建中五年為興元元年

門下致理興化必在推誠忘已濟人不吝改過朕嗣守
丕構君臨萬方失守宗祧越在草莽不念率德誠莫追
於既往永言思咎期有復於將來明徵厥初以示天下

惟我烈祖邁德庇人致俗化於和平拯生靈於塗炭重
熙積慶垂二百年伊爾卿尹庶官洎億兆之衆代受亭
育以迄於今功存於人澤垂於後肆予小子獲纘鴻業
懼德不嗣罔敢怠荒然以長於深宮之中暗於經國之
務積習易溺居安忘危不知稼穡之艱難不察征戍之
勞苦澤靡下究情不上通事既壅隔人懷疑阻猶昧省
已遂用興戎徵師四方轉餉千里賦車籍馬遠近騷然
行齎居送衆庶勞止或一日屢交鋒刃或連年不解甲

胄祀奠乏主室家靡依生死流離怨氣凝結力役不息
田萊多荒暴命峻於誅求疲亾空於杼軸轉死溝壑離
去鄉閭邑里丘墟人煙斷絕天譴於上而朕不悟人怨
於下而朕不知馴致亂階變興都邑賊臣乘釁肆逆滔
天曾莫愧畏敢行凌逼萬品失序九廟震驚上辱於祖
宗下負於黎庶痛心覩貌罪實在予永言愧悼若墜深
谷賴天地降祐神人叶謀將相竭誠爪牙宣力屏逐大
盜載張皇維將弘永圖必布新令朕晨興夕惕惟念前

非乃者公卿百寮累抗章疏猥以徽號加於朕躬固辭不獲俯遂輿議昨因內省良用矍然體陰陽不測之謂神與天地合德之謂聖顧惟淺昧非所宜當文者所以成化武者所以定亂今化之不被亂是用興豈可更徇羣情苟膺虛美重余不德祇益懷慙自今以後中外所上書奏不得更稱聖神文武之號夫人情不常繫於時化天道既隱亂獄滋豐朕既不能弘德導人又不能一法齊衆苟設密網以羅非辜為之父母實增愧悼今上

元統歷獻歲發生宜革紀年之號式數在宥之澤與人
更始以答天休可大赦天下改建中五年為興元元年
自正月一日昧爽以前大辟罪已下罪無輕重咸赦除
之李希烈田悅王武俊李納等有以忠勞任膺將相有
以勲舊繼守藩維朕撫馭乖方信誠靡著致令疑懼不
自保安兵興累年海內騷擾皆由上失其道下罹其災
朕實不君人則何罪屈已弘物予何愛焉庶懷引慝之
誠以洽好生之德其李希烈田悅王武俊李納及所管

將士官吏等一切並與洗滌各復爵位待之如初仍即遣使分道宣諭朱滔雖與賊泚連坐路遠未必同謀朕方推以至誠務欲弘貸如能効順亦與惟新其河南北諸軍兵馬並宜各於本道自固封疆勿相侵軼朱泚大為不道棄義蔑恩反易天常盜竊名器暴犯陵寢所不忍言獲罪祖宗朕不敢赦其應被朱泚脅從將士官吏百姓及諸色人等有遭其扇誘有迫以兇威苟能自新理可矜宥但官軍未到京城以前能去逆効順及散歸

本道者並從赦例原免一切不問天下左降官即與量
移近處已量移者更與量移流人配隸及藩鎮効力并
緣罪犯與諸使驅使官兼別勅諸州縣安置及得罪人
家口未得歸者一切放還應先有痕累禁錮及反逆緣
坐承前恩赦所不該者並宜洗雪亡官失爵放歸勿齒
者量加收叙人之行業或未必兼構大厦者方集於羣
材建奇功者不限於常檢苟在適用則無棄人況黜免
之人沈鬱既久朝過夕改仁何遠哉流移降黜亡官失

爵配隸人等有材能著聞者特加錄用勿拘常例諸軍使諸道赴奉天及進收京城將士等或百戰摧敵或萬里勤王扞固全城驅除大憝濟危難者其節著復社稷者其業崇我圖爾功特加彝典錫名疇賦永永無窮宜並賜名奉天定難功臣身有過犯遞減罪三等子孫有過犯遞減罪二等當戶應有差科使役一切蠲免其功臣已後雖衰老疾患不任軍旅當分糧賜並宜全給身死之後十年內仍回給家口其有食實封者子孫相繼

代代無絕其餘叙錄及功賞條件待收京日並準去年
十月十七日十一月十四日勅處分諸道諸軍將士等
久勤扞禦累著功勲方鎮克寧惟爾之力其應在行營
者並超三資與官仍賜勲五轉不離鎮者依資與官賜
勲三轉其累加勲爵仍許回授周親内外文武官三品
已上賜爵一級四品已上各加一階仍並賜勲兩轉見
危致命先哲攸貴掩骼瘞禮典所先雖効用而或殊
在惻隱而何間諸道將士有死王事者各委所在州縣

給遞送歸本管官為葬祭其有因戰陣殺戮及擒獲伏辜暴骨原野者亦委所在逐近便收葬應緣流貶及犯罪未葬者並許其家各據本官品以禮收葬自頃軍旅所給賦役繁興吏因為姦人不堪命咨嗟怨苦道路無聊汔可小康與之休息其墊陌及稅間架竹木茶漆摧鐵等諸色名目悉宜停罷京畿之內屬此寇戎攻劫焚燒靡有寧室王師仰給人以重勞特宜減放今年夏稅之半朕以兇醜犯闕遽用于征爰度近郊息駕茲邑軍

儲克辦師旅攸寧式當褒旌以志吾過其奉天宜升為
赤縣百姓並結復五年尚德者教化之所先求賢者邦
家之大本永言茲道夢想勞懷而澆薄之風趨競不息
幽棲之士寂寞無聞蓋誠所未孚故求之未至天下有
隱居行義才德高遠晦跡丘園不求聞達者委所在長
吏具姓名聞奏當備禮邀致諸色人中有賢良方正能
直言極諫及博通墳典達於教化并洞識韜鈴堪任將
帥者委常參官及所在長吏聞薦天下孤老鰥寡惇獨

不能自活者並委州縣長吏量事優恤其有年九十已上者刺史縣令就門存問義夫節婦孝子順孫旌表門閭終身勿事大兵之後內外耗竭貶食省用宜自朕躬當節乘輿之服御絕宮室之華飾率已師儉為天下先諸道貢獻自非供宗廟軍國之用一切並停應內外官有冗員及百司有不急之費委中書門下即商量條件停減聞奏布澤行賞仰惟舊章今以餘孽未平帑藏空竭有乖慶賜深愧於懷赦書有所未該者委所司類例

條件聞奏敢以赦前事相言告者以其罪罪之亡命山
澤挾藏軍器百日不首復罪如初赦書日行五百里布
告遐邇咸使聞知

平朱泚後車駕還京大赦制

門下致理之體先德後刑禮義興行故人知恥格教令
明當則俗致和平然後姦慝不萌暴亂不作古先哲后
莫不由斯國家受命百七十載八聖儲慶敷佑下人邁
種寬大之德累蠲苛酷之令蓋仁之所積者厚故澤之

所流者深茲予小子獲主重器懵於理亂之本溺於因
習之安授任不明賞罰乖當立法以齊衆而犯命愈甚
興戎以除害而長亂益繁賊臣蓄姦乘豐竊發九廟之
祀兆人靡依猘猢肆其吞噬豺狼穴於宮闕歲未云半
載罹播遷仰慚穹昊俯愧臣庶敢愛賁越苟全眇躬誠
懼益縱寇讎重辱宗社忍恥誓志庶補前羞賴億兆宅
心不忘先德諸帥勗力恭行天罰俾余寡昧再膺多祐
總乾綱於既紊復天柱於將傾言旋鎬京不改舊物宗

祧有序朝享有期責重慶多深增感惕嗚呼君者所以
撫人也君苟失位人將安仰朕既不德致寇興禍使生
靈無告受制兇威苟全性命急何能擇或虧廢名節或
貪冒貨利陷於法網事匪一端究其所由自我而致不
能撫人以道乃欲繩之以刑豈所謂恤人罪已之誠含
垢布和之義滌清汚俗咸與更新可大赦天下自興元
元年七月二十三日昧爽已前大辟罪已下已發覺未
發覺已結正未結正見繫囚徒常赦所不原者咸赦除

之今年五月二十八日已前左降官即與量移未復資者更與移近處流人及犯配隸藩鎮効力並即放還亡官失爵放歸不齒者量加收敘未復資者更與進改其黜免人等有素著行能傍連譴累特加錄用勿以為負不有忠者誰復社稷不有勞者誰從巡狩連帥之重所以殿邦禦侮也二千石之任所以分憂共理也方鎮將校勤奉戎役中外寮吏恪居官次國有大慶所宜同之內外文武及致仕官三品已上賜爵一級四品已上加

一階仍並賜勲兩轉司徒兼中書令晟英特傑立光輔
中興再定皇都一匡天下推恩之典貽慶無窮宜與一
子五品正員京官侍中瑊沈邃忠厚服勞王家保全危
城翦除大慙嘉乃茂績次於寵章宜與一子六品正員
京官鎮國軍潼關節度使檢校右僕射駱元光京畿渭
南商州節度使檢校右僕射尚可孤邠寧等州節度使
檢校右僕射韓遊瓌奉天行營諸軍節度使檢校右僕
射戴休顏咸秉大節著於艱難同勲叶忠翼我興運宜

各與一子七品正員官諸道節度使及行在都知兵馬使興元扈從左右金吾大將軍金吾六軍大將軍等各與一子八品正員官諸道團練觀察處置等使各與一子九品正員官應諸軍赴上都收復將士等俱以純誠奮其勇節連年帶甲百戰摧鋒有忘身以効命有滅親以徇義誓平國難如復私讎競揚貔虎之雄克清梟獍之孽策勲行賞傳嗣榮親播乃功名與國終始自去年冬已來未經甄敘者即與超八資改轉已經甄敘者更

與超三資進改三品已上祖父母在先無官封者量與致仕官及邑號亡者並與追贈四品已下父母在先無官封者亦授致仕官及邑號亡者與追贈其賞錢委所司即依元勅支給應扈從將士三品已上賜爵兩級四品已下各加兩階仍並賜勲其祖父母官封追贈並準收京城將士例處分應扈從官普恩之外三品已上賜爵兩級四品已下各加兩階仍普賜勲三轉其祖父母父母封贈並準收京城例處分應扈從官普恩之外三

品已上更加爵一級四品已下更加一階若常參官祖
父母父母在先無官封者量授致仕官及邑號亡者與
追贈諸州刺史普恩外賜爵一級諸道進奏陪位者更
加一階其奉天定難及元從功臣宜令本軍本使即定
名聞奏所司各準元勅優賞其諸道軍鎮及行營將士
三品已上賜爵一級四品已上加一階仍準今年正月
一日制速與甄敘成德淄青魏博等節度并諸軍應歸
順將士等各蘊誠義積著功勞由朕失於撫綏頃歲暫

懷疑阻尋能勵節不替舊勲是資宴犒俾洽王澤宜委
所司即約額支計各賜錢物賞設仍委本節度準前後
勅速條疏甄敘其朔方并諸軍應在河中管內及同州
將士等自遠赴難解其重圍念茲功勞並未酬報雖遭
脅制情有可矜應到行營未經甄敘者並準元勅超五
資改轉其賞錢比收京城將士例各給一半委本軍兵
馬使條錄名銜聞奏所司支計給付其食實封者亦便
配額令其請受應天下諸道軍將士等如有年老及疾

患厄弱不任軍旅願歸鄉里者並給終身優復州縣切
加安存勿令侵擾如無家可歸者給田宅使得存濟見
危致命先典所尚況忠衛社稷殺身成功朕於斯人義
有加等贈太尉秀實天授貞烈沮茲姦邪蒼黃之中獨
蘊雄斷將紓國難詭收寇兵兇謀既虧吾事果濟忠誠
奮發手擊渠魁英風凜然振邁千古宜即差官致祭并
旌表門閭府縣護其喪事緣葬所要一切官供仍於墓
所官為立碑以揚徽烈其所賜實封五百戶嫡子正員

三品官諸子授正員五品官委中書門下即準元勅處
分應諸道諸軍將士有身死王事者委本道本使具名
銜聞奏即與褒贈仍以在身官爵授其子孫内外文武
官及諸親諸色人等有橫遭逆賊殺害者各聽其家及
親識人於所司陳牒勘實聞奏亦與追贈如跡著忠烈
衆所明知仍訪其子孫量加優恤尚齒養老王風之首
三代制理未或遺年朕將遵古典以興化本人心而教
孝用優秩賜式慰里閭京兆府耆壽年八十已上並與

板授刺史仍賜紫八十已下及諸州府耆壽年八十已

上並與板授本縣令仍賜緋天下侍

侍字疑

老者壽亦各

與板授官如年九十已上者州縣長吏歲時躬親省問
貧弱不能自存者量賜粟帛頃屬多難人流俗弊加之
以師旅因之以饑饉賦役繁起農桑失時哀哉瘠人汔
可小息然以國計猶歎軍實靡充未盡復除良增愧悼
應天下建中四年年終已前所有諸色逋欠在百姓復
內者一切放免百司及諸軍諸使舉放利錢今年六月

已前百姓欠負未納者亦並停徵京兆府百姓普恩外
給復一年其供頓官吏委京兆尹類例具名銜聞奏量
與優獎古者計戶以署吏因時而建職既不乏事亦無
冗員今田畝汙萊版圖凋耗齊人編戶託庇官曹貪吏
猾胥誘為囊橐啓姦墮業為害尤深應在京百司色役
人及流外等委御史大夫即與諸司使長官審詳商議
據見所掌事之閑劇定額聞奏仍校名送中書門下務
從減省副朕憂人以後應須署置並定名先奏仍永為

常式今年正月一日赦書節目有所未行者所司並舉而行之赦書或有不該即比類條件聞奏敢以赦前事相言告者以其罪罪之亡命山澤挾藏軍器百日不首復罪如初赦書日行五百里布告遐邇咸使聞知

翰苑集卷一

欽定四庫全書薈要卷二萬六百八

集部

翰苑集卷二

唐 陸贄 撰

制誥

赦宥中

貞元改元大赦制

興元二年正月一日

門下王者體元立極欽若乎天地纂業承統嚴奉於祖宗用能百神允諧兆庶永賴立國之本斯其大經朕燭理不明違道招損往遭多難淪陷國都天地宗祧曠而

莫主則是欽若嚴奉之義缺矣甚用懼焉洎復京師遽將告謝有司以人力耗斲禮物廢隳日居月諸歲聿云暮卜其吉日俯在上春齊心永懷坐以待曙而百辟卿士抗疏上言咸謂人心未寧不足以盡敬寇孽猶在不足以告功迫於羣情俯抑誠願郊廟孔邇瞻言莫從悼心慚顏胡寧自處重以和平未洽災沴荐臻去歲旱蝗兩河為甚人流不息師出靡居加以徵求因之以荒饑困窮殍餒轉死丘墟闕輔之間冬無積雪土膏未發

宿麥不滋詳思咎徵有為而致兵戎之後餘祿尚存獄
犴之中深冤未釋又河中淮右逆將阻兵汙脅齊人陷
之死地雖欲自雪厥路無由抱義銜冤足傷和氣此皆
由朕爽德播災於人為之父母實用愧恥今元陰已謝
春日載陽勾萌畢伸幽蟄咸震思與海內同心自新發
號更元用符天意宜改興元二年為貞元元年自正月
一日昧爽已前大辟罪已下已發覺未發覺已結正未
結正繫囚見徒罪無輕重咸赦除之先準勅令量移收

敘人所司據節文速與處分應河中脅從將士多是奉
天赴難功臣本居朔陲夙尚忠節豈以一夫誑誤棄其
累代勲庸朕於此軍尤所不忍特宜洗滌待以初誠自
非與官軍決戰死於鋒刃其餘雖臨陣擒獲亦從釋放
棄逆歸順者在身先有官爵實封一切如舊仍準前後
敕所在便給賞錢并與甄敘如有因危効節建立殊庸
量其事績特加獎擢李懷光若能幡然悔過束身赴朝
念其嘗有大勲必當終始全護仍準前勅授之官封朕

於功臣庶亦無負淮西將吏百姓等皆被刼制久為匪
人詢事原情諒非獲已今王師四合計日誅夷玉石俱
焚用增惻憫宜令諸道進軍之日唯存首惡一人其餘
徒黨悉從原宥如有歸順及立功者並準河中將士例
褒獎夫為國之要在於審官共理分憂守宰彌切闔境
性命繫乎其人將使里閭無愁苦之聲風俗興廉讓之
教得不慎東髦彥寄之化源自今已後諸州刺史有關
中書門下於朝官中精擇有理人才術者授之如刺史

縣令在任頻年課績尤異者擢授侍郎給舍郎官御史
中外迭處用觀其能賞罰必行期於競勸自項選曹署
吏唯以書判求人務騁浮華莫稽實行且能言者不必
適用蘊用者或未能言凡為擇人其在精覈宜令清資
常參官每年於吏部選人中各舉所知一人堪任縣令
錄事參軍者所司依資敘注擬便於甲歷之內具標舉
主名銜仍牒報御史臺如到任後政尤異者有贓犯事
跡著明者所司錄舉官姓名聞奏以為褒貶其內外員

及京城諸使名目委御史審勘會商量并省停減仍集
百寮定議務從簡約息費使人其京官職田及息利官
錢等點吏詆欺移易疆畔或貧人轉徙捕繫親鄰日月
滋深耗弊彌甚亦令百寮議其折衷擇善而行往以賦
役殷繁人不堪命定為兩稅事額易從比屬軍興或踰
始制法無所守更益為姦哀我勞人汙可小息自諸道
州府除兩稅外應有權宜科率差使一切悉停京畿及
近縣所欠百姓和糴價直委度支即勘會支給諸道非

臨寇賊州縣自冬已來點召官健子弟並宜放散任營
生業應經陷賊州縣百姓屋宇被焚毀并貧病老弱及
遭傷損之類所在量加優恤使得安存天下名山大川
并自古聖帝明王賢臣烈士祠廟墳墓各委當處長吏
擇日致祭必資精潔以達志誠班制有差所以序賢也
廩秩有等所以明勸也今或高卑失序中外相踰至於
卿士之家尚罹凍餒之患忠信重祿豈其然耶内外官
祿及俸錢手力雜給等委中書門下度支即參詳定額

聞奏應赴奉天及收城將士等並功存社稷節著艱危
中心藏之豈忘酬報頃緣府藏空竭賞給未周乃眷勲
臣實用增愧應準元勅合請賞錢人委所司節減在官
及百司費用據所有財物速與給付應在京城及諸道
立功將士等先有詔旨並許甄升所司勘會淹歷時月
委中書門下即準元勅處分諸軍行營并河中朝邑被
脅從將士家口在京及諸州府者宜令本道節度觀察
使安存賑恤各令優給應諸軍使立仗見在城將士等

共賜七萬匹制書有未該備所司速比類條件聞奏敢
以赦前事相言告者以其罪罪之亡命山澤挾藏軍器
百日不首復罪如初赦書日行五百里遐邇咸知

冬至大禮大赦制

貞元元年
十一月

門下君天下者受命於天地繼業于祖宗致其誠心惟
敬與孝違敬莫大乎廢祀虧孝莫大乎黷神朕以眇身
屬承大統縱欲敗度浸生厲階兵連禍深變起都邑六
師播蕩九服震驚郊廟園陵陷於凶逆神人乏主將迨

周星列聖大業幾墜於地違虧敬孝罪由朕躬撫臨萬
邦甚用自愧側身思咎庶補將來股肱元臣比義叶德
爪牙衆士勦力同心誅大憝而都邑廓清翦逋寇而關
河底定茲再與王公卿尹洎億兆之人備其盛容修其
禮物薦誠清廟展敬園丘陳謝罪愆告雪憤恥感慕慙
惕若無所容上帝顧懷再新景命豈伊匪德獨荷鴻休
思與普天誕膺多福可大赦天下自貞元元年十一月
十一日昧爽已前大辟已下已發覺未發覺已結正未

結正繫囚見徒罪無輕重常赦不原者咸赦除之左降
官量移近處流人及藩鎮効力並即放還應有痕玷禁
錮前後恩赦節文未該及者亦宜洗雪勿以為累李希
烈僭逆不道誠所難容朕憫念蒼生務息征討頻有詔
命許其自新若能歸降依前勅待以不死淮西管內將
士官吏百姓等一切原宥與之如初先有官封亦皆復
舊如能特建功効者當別抽擢若家口親屬在諸道者
長吏綏撫各使安存其歸順百姓仍委節度觀察使刺

史給空閑地任便安居優復終身務令全濟待事平已
後聽歸本貫天下百姓去年十二月已前欠負官稅官
租及諸色人逋懸一物已上但不在官典復內者一切
免放内外文武官見任及致仕官三品已上賜爵三級
四品已下加一階天下諸使諸將軍士三品已上賜爵
一級四品已下加一階白身人賜勲三轉自頃先渠倡
亂逆臣附姦保據國都憑陵旬服朕出次郊邑再遷巴
梁險阻艱難靡不經歷暴亂之後仍彰烈士之功憂危

之中方見直臣之節錄勲進善其可弭忘應奉天興元
元年扈從立功并收京城將士食實封者各隨文武與
一子官餘並加兩階仍賜勲三轉其文武百官應扈從
到興元府者五品已上賜爵一級六品已下加一階合
入三品五品者不拘考限聽敘其五品已下父母未經
追贈者與追贈應平河中將士即準元勅速與甄獎自
建中四年已來有身死王事義烈著明未經褒贈者本
道即具名銜事跡聞奏諸道有解退官健州府長吏切

務安存仍量以空閑田地給付免其差役任自營生社
稷之勲以輔興王業統帥之任以總制戎麾參袞職者
其德宗授旄節者其功大方鎮乃國之垣翰禁衛實予
之爪牙尹京實賴於肅清主計尤資於辦集所頒慶澤
宜越常倫司徒兼中書令晟宜與一子五品正員官并
四品階諸道副元帥與一子六品正員官中書門下平
章事充節度使各與一子七品正員官節度使及神策
兵馬使六軍統軍金吾六軍大將軍判度支侍郎各與

一子八品正員官都團練都防禦等使京兆河南尹金
吾六軍將軍殿前射生兵馬使各與一子九品正員官
多難以來三十餘載克平禍亂屬在戎臣或節著艱危
或勲高戰伐受任雖專於總帥成功亦賴於羣材懋賞
推恩宜加裔嗣諸道大將功業崇高者各與一子官本
使即詳定錄名聞奏副元帥都統兼節度下每道各二
十人都團練都防禦使下各十人如大將子孫之中有
藝業優長性行純確者本使具狀聞薦仍量事資給令

赴上都朕當隨材授官以充侍衛庶使忠臣之後與國
無窮故尚父子儀先朝元勲再復京邑贈大尉秀實以
死為國節冠古今宜令與子孫一人五品正員官自至
德已後節度使大將有忠烈績効著明其後淪翳者所
司即條錄聞奏與子孫一人正員官諸色人應在賊中
潛奉神主項已甄賞宜便賜優崇三品已上賜爵一級
四品已下加一階江淮轉運使檢校左僕射同中書門
下平章事韓滉勵精勤職夙夜在公漕輓資儲千里相

繼事無憊素人不告勞拯於凶災厥有成績可進封晉
國公關畿之內連歲興戎存屬天災稼穡不稔穀糴翔
貴烝黎困窮倉廩空虛莫之賑贍每一興念憫然痛心
宜令度支取江西湖南見運到襄州米十五萬石設法
般赴上都以救百姓荒饉如山路險阻車乘難通仍召
貧人令其般運以米充脚價務於全活流庸庶事優饒
副朕勤恤立國之道始於親親所以厚骨肉之恩明教
化之本況存經艱故宗族漂淪敦睦之情有加常典大

長公主長公主公主各與一子七品官嗣王郡王郡主
縣主各與一子官出身應陪位皇親五等已上諸親三
等已上者三品已上賜爵一級四品五品加一階六品
已下及常選官散官等簡選日優與處分未出身人量
授文武散官如宗子中有德行才能宗正卿具名聞奏
當別獎任致理之本在乎審官審官之由資乎選士將
務選士之道必精養士之方魏晉已還澆風未革國庠
鄉校唯尚浮華選部禮闈不稽實行學非為已官必徇

人法且非精弊將安救宜令百寮詳思所宜各修議狀
中書門下參較得失擇善而行有虞建官三載考績在
漢為吏或長子孫蓋吏久於官則人情不苟官久於事
則理化有成日者制度廢隳考課乖舛淹速靡準升降
無名欲令庶寮何以懲勸自今以後刺史縣令未經三
考不得改移其餘非在職績効殊尤亦不得越次遷轉
刺史停替須待魚書內外五品已上及常參官在任年
考已深者即量才効用與改中外迭處以觀其能夫明

目達聰務廣聞見或慮懷才抱器輸忠納諫之倫地處
幽遐無由自達永言於此夢想不忘應諸色人有長策
濟時忠規匡主任具陳所見詣所居之州委刺史略與
討論觀其旨趣但有裨治道不涉私情便與附驛遞送
朕當親覽自立兩稅經今百年或初定之時已有偏併
或戶口減耗舊額猶存輕重不均流亡轉甚委度支即
折衷條理以卹困窮古者雖有水旱人無菜色皆由儲
畜不匱勸導有方前代所置義倉國初亦循其制備災

救乏甚便於人即宜準貞觀故事天下所墾見田上自王公下及百姓每豐稔之歲秋夏兩時州縣長官以理勸課據頃畝多少隨所種粟豆稻麥逐便貯納以為義倉如年穀不登即量取賑給官司但為其立法勸諭不得收管仍各委本道觀察使逐便宜處置聞奏敦本厚生必資播殖當今所切莫甚於斯自今百姓有墾闢田疇加於常歲者所加之地不得輒徵租稅刺史令長考課亦以本界墾田多少為殿最今年蝗旱損甚州府開

春之後量給種子使就農功天下應荒閑田有肥沃堪
置屯田處委當管節度使觀察都團練都防禦等使刺
史審細檢行以諸色人及百姓情願者使管佃如部署
精當收獲數多本道刺史特加褒升屯田等節度優賞
如是逃戶田地本主復業即却給還輦轂之下四方會
同供應既多難為準定急賦繁役人何以堪宜令京兆
尹與度支計會長安萬年兩縣每季各先支貯備錢五
千貫文於縣庫收納定清幹官專知應緣卒須別索及

雜供擬并工匠等縣令與專知官先對給價錢季終之後申度支勘會所是和市和雇並須先給價錢兩稅外一物已上不得科配百姓御史臺朝廷紀綱尚書省治化根本百度得失繫乎其人自頃制勅頒行所司多不遵守王臣奉職豈所宜然委御史臺左右丞切糾稽違無壅朕命南郊太清宮太廟應職掌行事官郊廟攝將軍中郎郎將及留守副留守內定行從官三品已上各賜爵一級四品已下加一階並賜勲兩轉其諸色支供

作官司直長上流外灼然要職掌者並賜勲兩轉行事
室長掌坐齋郎禮生贊者減二年勞無勞可減者簡選
日優與處分崇賢館學生見在者減帖策各一道國子
監陪位學生賜勲一轉介公鄩公各與一子官如無子
孫賜物一百匹神策六軍殿前左右射生英武威遠皇
城左右金吾街使將士應緣大禮宿衛御樓立仗及守
本庫本營者共賜物若干端匹天災作沴深儆予衷跼
踖憂慚罔知攸措今穀價騰踊人情震驚鄉閭不居骨

肉相棄流離殞斃所不忍聞公私之間廩食俱闕既無賑恤又復徵求財殫力竭繼以鞭笞弛征則軍糧乏贍厚取則人何以堪念茲困窮痛切心骨思所以濟浩無津涯補過實在於增修救患莫如於息費致咎之本既由朕躬謝譴之誠宜自朕始宜令尚食所進御膳每日各減下一半應宮人等每月惟供給糧米一千五百碩飛龍廐馬從今已後至三十日已前並減一半料京兆府應差科百姓及和市和買等諸色目事無大小一切

並停公私債負容待蠶麥熟後徵理

翰苑集卷二

欽定四庫全書薈要卷二萬六百九集部

翰苑集卷三

唐 陸贄 撰

制誥

赦宥下

貞元九年冬至大禮大赦制

門下朕以寡德屬當大統皇天眷佑俾主兆人懼不克承夙夜祇畏緬懷先烈致於昇平予心浩然罔知攸濟小大之務曷嘗不勤芻蕘之言亦莫不敬慮每存於致

理志常在於恤人中宵屢興終食累歎一事乖張怒焉
疚懷一夫罹殃惻若傷體思與海內同臻大和息其生
業降心從衆實匪有辭克己利人誠無所恡然以視聽
有極思慮難周況乎長自深宮安於近習損益之理寧
免過差幽遠之情固多未達由是兢兢砥礪悔往修來
燭理所患於不明推心庶幾於無負日慎一日於今十
有五年矣上靈降監多士叶誠五稼屢豐四鄙不擾方
鎮輯睦干戈底寧邊壘繕完殊方款附協天地會昌之

運實宗社無疆之休慶既荷於元功禮有昭於大報矧
惟霜露之感永切孝思禋燎之儀每勤精意將申誠敬
其在躬親是與公卿大夫虔奉犧牲圭璧陳其文物薦
其馨香類秩於泰壇朝享於清廟率職來助萬邦攸同
備物致嚴百禮具舉誠慕獲展神人允諧明發永懷慶
感斯集純嘏所錫豈惟朕躬思俾普天均承惠澤可大
赦天下貞元九年十一月十日昧爽已前繫囚見徒大
辟已下罪無輕重咸赦除之其見於官辯對者亦並於

免官人犯入已贓不可令其却上已後勿以為累左降
官及流人並量移近處其官已經量移未復資者還其
階爵竄謫遐裔冀速沾恩比者準制量移所司比例申
牒屢加盤覆累涉歲年既甚淹遲且不均一宜令吏部
刑部審勘檢本流貶及量移勅旨比類元犯事狀輕重
兩月內與處分文武見任及致仕家居并諸軍諸使
將士等三品已上賜爵一級四品已下加一階應百姓
自置義倉仍準貞元元年十一月十一日制處分立人

之道惟孝與忠孝莫大於榮親忠莫先於竭節惟爾師
長卿校洎乎方岳列藩保乂皇家交修庶績竭節之効
既昭乃誠榮親之恩宜洽國典内外文武清望職事官
并節度觀察都防禦都團練經略等使父在未有官量
授檢校五品官母在未有邑號者各封邑號父母亡沒
者量與追贈已經追贈者更與改贈佐運之臣納忠之
輔功既存於社稷慶宜及於子孫故周錫田土漢傳帶
礪疇其爵邑與國終始以明報德之恩勸為臣之節其

或年代未遠利澤猶存祠宇已變於荒墟裔嗣不編於仕籍思其人猶愛其樹況莫享之主而不加省錄者乎興滅國繼絕代所以禮先賢也修宗廟敬祀事所以教追孝也化俗歸厚此其大端應九廟配享功臣及武德以來將相名節特高有封爵廢絕祠廟無主者宜許子孫一人紹封以時享祀自今以後應有家廟子孫但傳襲封爵者並許享祔於廟其有毀賣私廟及買之者各以犯教義贓論自古聖帝明王忠臣烈士各令所在長

吏以禮致祭書叙明目達聰垂拱而理詩稱濟濟多士
文王以寧舍己從人故能通天下之志棄瑕錄用故能
盡天下之才皆在太宗勤求理道納諫如響任賢勿疑
致俗於太平垂範於永代朕獲承鴻緒追慕聖猷書之
座隅常自敝勵朝夕翹想庶聞嘉謀夢寐勞懷思得賢
士凡厥在位所宜共成諸司官有陳便宜者各盡所見
條疏封進事有冤滯政有關遺悉當極言無或隱避詔
勅不便於時者所司執奏以聞天下有蘊德懷才隱居

不仕委所在觀察使表薦當以禮邀致諸色人中賢良方正能直言極諫或博通墳典達於教化或詳練故事長於著述或精習律令曉暢法理或該明吏術可委理人或洞識韜略堪任將帥者委所在州府長吏及臺省常參官詳錄行能舉奏並限來年七月內到京朕當親試應緣大禮掌職行事仗內引駕攝將軍中郎郎將留守副留守并諸道表狀陪位法駕三引官等三品以上更賜爵一級四品已下加一階其郊壇宮廟行事官仍

各賜勲兩轉皇親諸親應陪位者三品已上賜爵一級
四品五品加一階六品已下及常選官至選日優與處
分白身人及諸色應陪位官等各賜勲兩轉親王大長
公主郡主縣主賜物各有差鄒公介公各賜物若干段
行事室長掌坐齋郎禮生贊者各減一年勞無勞可減
者至簡選日優與處分崇賢館學生減策一道國子監
學生陪位者及應緣祇應諸司作官直長長上流外要
職掌內侍省白身諸州行綱考典兩京耆壽諸色番役

當上在城并量留十月番人等各賜勲一轉鴻臚番客
共賜物若干神策六軍英武威遠皇城金吾街使諸軍
諸使將士應緣大禮宿衛御樓立仗及守本庫本營者
共賜物若干端匹天下耆老百歲已上者各賜錦帛五
段米五碩八十已上及鰥寡惸獨不能自存者委敕吏
縣令各加優恤應緣大禮加階及賜勲爵等申報敘奏
期限並準貞元六年十二月二日勅處分餘依常式所
司不須更作條件敕書日行五百里布告遐邇咸使聞

知

蝗蟲避正殿降免囚徒德音

夫人事失於下則天變形於上咎徵之作必有由然自
去歲已來災沴仍集雨澤不降延厯三時蟲蝗既臻彌
亘千里穀糴翔貴稼穡卒瘁嗷嗷烝人聚泣田畝興言
及此實所痛傷徧祈百神曾不獲應方悟禱祀殊救患
之術言詞非謝譴之誠憂心如焚深自刻責得非刊法
舛謬忠良鬱堙暴賊未蠲勞師靡息事或無益而重為

煩費任或非當而橫肆侵蝨有一於茲足傷和氣本其所以罪實在予百姓何辜重罹殍餒所宜出次貶食節用緩刑側身增修以謹天戒朕避正殿不御百寮奏事並於延英處分尚食進膳宜更節減百司不急之務一切且除諸軍將士外自餘應食官糧人及諸色用度等並委本使長官商量權行停減以救荒饉仍限十日內具元額及所釐革條件聞奏待至豐稔却令依舊畿內百姓委京兆尹切加慰撫除正稅正役外徵科差遣並

宜禁絕非交相侵奪尋常訴訟不須追擾務且息人京畿內外及京兆府諸縣見禁囚徒死罪降徒流以下一切放免畿內及河中同州界應有因戰陣殺戮遺骸暴露者各委所在長吏隨事殮瘞咨爾卿佐實惟股肱所當一其誠心同恤災患勉修厥職副我憂勤

誅李懷光後原宥河中將吏并招諭淮西詔

自昔哲王以道化下不竭物以充欲不勞人以樹威億兆之心如戴父母兵革不試四方來同苟或昧於德綏

務以力勝士旅疲耗烝黎困窮幸以成功豈云有補李
懷光久從戎旅頗著勤勞拔於等倫授以旄鉞誓師河
朔奔難奉天有夷兇嫉惡之誠有弭患釋圍之績俾介
元帥仍升上台秉心匪彛自底不類怙衆貪亂附姦脅
君朕用再遷幾危宗廟洎股肱宣力賊泚就誅率土之
人咸懷奮擊朕獨排羣議未忍加兵命復官封志期全
貸而乃昏迷不返悖慢逾彰殘害使臣侵敗畿甸密邇
京邑人愁無聊諭之不悛乃用致討上帝悔禍元臣協

謀克集茂勲以夷大難渠魁授首餘衆革心制勝以謀
兵無血刃雖事非獲已義在救人而本其所由情深罪
已蓋以信誠未著撫馭或乖至使功臣陷於誅戮謂之
克敵寧不愧心然以懷光一家法當殲戮念其昔居將
相嘗寄腹心罪雖掛於刑書功已藏於王府以干紀之
跡固合減身以赴難之勲所宜有後非常之澤俾洽幽
明雖屈彛章庶旌往効大夫君子無我有尤宜以懷光
一男為嗣賜莊宅各一所聽住京城仍還懷光首級及

屍任便收葬其妻及諸子孫在室女等並遞送澧州委李臯逐便安置使得存立其出嫁女及諸親戚並宜釋放應先陷河中將士等皆嬰迫脅無路申明多是朔方舊人素蘊忠義并幽州涇原將士頃被朱泚脅從收京之時奔竄在彼究其本末情有足矜況能協力同謀舉城歸順錄其成效咸與惟新宜一切洗雪勿為瑕累先有官爵實封者並許仍舊其中首謀効順事績著明者委副元帥條件聞奏別加甄獎河中及同州絳州百姓

並經陷賊又久屯軍骨肉流離生業廢棄興言軫念良
用惻然宜各給復一年京兆府奉先美原等縣緣與同
州接近隨便供運杼軸既繁流亡頗衆委京兆尹即量
事優恤條件聞奏仍加招輯使各安存河中保義軍保
寧軍節度使并管內諸軍行營兵馬副元帥河中保寧
等軍節度度支營田觀察處置等使銀青光祿大夫檢
校司徒同中書門下平章事兼太原尹北都留守北平
郡王燧惟嶽降生鬱為時傑奉上勵匪躬之節訓師懷

盡敵之謀略地無遺攻城必拔發揚以威強寇感激而服叛徒嘉謀屢聞能事畢備朔方河中同絳陝虢汴等州及管內諸軍副元帥河中絳州節度觀察處置等使開府儀同三司行侍中兼河中尹咸寧郡王瑊鑒識精明宇量弘博秉義率衆推誠待人堅制不奪之心亟陳必勝之略輯睦士旅安慰流庸盛德克彰崇功允集惟乃二帥一其誠心奉行天誅同獎王室有崇讓之美有禁暴之能元惡既除全城底定是加寵命以答崇勲燧

可兼侍中仍與一子五品正員官并階餘並如故城可
檢校司空仍與一子五品正員官并階餘並如故華州
潼關鎮國軍節度使開府儀同三司檢校右僕射并華
州刺史上柱國武康郡王駱元光邠寧慶等州刺史御
史大夫上柱國許昌郡王韓遊瓌廊坊丹延等州節度
觀察使檢校兵部尚書兼御史大夫上柱國東平郡王
唐朝臣等並節著艱危功成討伐鎮於衝要隱若長城
取彼兇殘進無堅陣比義同德廓清方隅宜增食於真

封且延榮於蔭子可各賜實封二百戶仍與一子六品
正員官并五品階餘並如故應諸道諸軍同討懷光將
士等一自征役淹厯歲時被服干戈略無寧息賴茲勤
効是有成功宜並賜三十萬端匹以充宴賞仰度支即
般次送赴並各放歸本道仍令所司敘錄即超資與改
轉其中大將及功效殊尤者委所司速具名銜聞奏先
與處分其先在河中將士亦宜依例賜錢宴賞如本是
奉天定難功臣準條合給賞者度支即排比支付嗚呼

自國家多難二紀於茲朕嗣位七年連兵五載追惟往事悔恨於懷今二孽既誅諸方甫定哀彼淮右獨為匪人其帥不龔其衆何罪朕晨夕惕慮念之甚詳罷征討則阻命止於數州窮戰爭則流禍及於天下利病之勢較然相懸俾人罹殃寧我忍恥今勲賢列鎮疆理有經縱未偃戈足以保境況天地之大無所不容豈令是邦猶隔朝化因茲大慶使洽鴻恩諸道應與淮西接連宜且各守封境非被侵軼不須進討仍委所在長吏明加

招諭宣布朕懷李希烈若能歸降待以不死其餘將士
官吏百姓等一切並與洗滌與之更新先有官封亦皆
仍舊如能去逆効順因事建功理當甄升以示褒勸其
所以優賞科條並準前勅處分朕思與海內去危圖安
有過自新雖大必宥朗然明信彰示兆人期爾庶邦自
求多福無有遐邇咸使聞知

誅李希烈後原淮西將吏并授陳仙奇節度詔
反易天常悖違人紀衆之所棄罔或逃誅李希烈蔑義

背恩窮姦極暴謂神器可以力取謂生靈可以詐欺志
在光殘躬行僭竊罪無與比法實難容以君德不修致
人於禍究其端本過實在予不忍烝黎重相攻戰屢施
詔命務欲懷柔抑羣帥奮發之誠駐諸軍討逐之勢不
憚屈已期於息人希烈曾無悛心益逞驕志虐毒滋甚
吞噬無厭惡貫既盈自底夷滅開府儀同三司御史中
丞臨漳郡王陳仙竒忠勇有餘沉毅能斷攄闔境受污
之憤導三軍思順之心唱義一呼羣情響附廓清氛祲

殲戮渠魁驛書上聞函首入獻方隅既又役戍其休懸
賞之科是宜必信其以仙奇為檢校工部尚書兼蔡州
刺史御史大夫充淮西節度仍賜實封五百戶應淮西
管內將士官吏百姓等項迫先威遂從脅制既誅元惡
俱是平人除李希烈一家其餘並準前後赦勅原放更
無所問其將士等或本屬平盧或久鎮淮右素推忠義
累著勲庸果能叶志同謀輸誠奉順以茲節効良有可
嘉委仙奇即以諸色官錢優與宴勞其中首建謀議同

斬希烈人等宜並條錄聞奏節次褒賞比年以來有潛
圖効順節義著明計或未行為賊屠害者亦當審加訪
察具事績以聞如有子孫仍並錄名聞奏百姓等久經
淪陷兼被傷夷遐想凋殘實足哀憫除供當道軍用外
宜給二年應被希烈差點兵馬及團練子弟並即放散
其本額將士之中有不樂在軍願歸農業者委節度刺
史量給逃死戶田宅并借貸種糧優給復終身使之存
濟宜令尚書左丞鄭叔則充淮西宣慰使嗚呼往欽哉

自希烈叛命於今五年王澤不通下情亦阻所宜宣我
信令以釋危疑敷我惠和以慰疲瘵滌清污俗咸與惟
新底難一方以稱朕意


重原宥淮西將士詔

乃者希烈亂常阻兵竊號污脅士衆殘虐烝黎朕志在
好生誠深罪己為人受恥不忍加兵惟茲一軍代著忠
節果殲元惡不替舊勲詢於衆情就拜戎帥人亦勞止
期於小康旋乖卹下之方重致喪身之禍由朕薄德俾

人不寧撫臨萬邦且愧且悼猶賴將校士旅秉其誠心
邦人不驚軍部無撓以茲節効良有可嘉所宜慰安俾
洽寬澤應將士吏人承前所有諸過犯罪無輕重一切
釋放曠然昭洗咸與惟新其有先請受莊宅財物者各
以見管為主將士衣賜節料并家口糧賜等一切並準
舊例以時給付不得停減先令優與賞設亦準元勅處
分務令豐厚以稱朕懷仍加曉諭各委知悉



翰苑集卷三



總校官庶吉士臣侍朝

校對官庶吉士臣羅修源

謄錄監生臣南光普